



NEGERI SELANGOR

**ENAKMEN 7 TAHUN 1999
ENAKMEN WAKAF (NEGERI SELANGOR) 1999**

Tarikh Persetujuan DiRaja : 29 Disember 1999
Tarikh disiarkan dalam *Warta*: 30 Disember 1999
Tarikh mula berkuatkuasa : 1 Julai 2004 [Sel. P.U. 8/04]

SUSUNAN SEKSYEN

[Tajuk Panjang & Mukadimah](#)

BAHAGIAN I - PERMULAAN

Seksyen 1. [Tajuk ringkas, pemakaian dan permulaan kuat kuasa.](#)
Seksyen 2. [Tafsiran.](#)

BAHAGIAN II - PEWUJUDAN WAKAF

Seksyen 3. [Pewujudan wakaf.](#)
Seksyen 4. [Mula berkuat kuasa wakaf.](#)
Seksyen 5. [Waqif berhak menentukan syarat-syarat mawquf-alaih.](#)
Seksyen 6. [Pendaftaran wakaf.](#)
Seksyen 7. [Wakaf oleh seseorang yang dalam keadaan marad al-maut.](#)
Seksyen 8. [Wakaf taklik.](#)
Seksyen 9. [Wakaf irsod, muabbad, musyak atau musytarak.](#)
Seksyen 10. [Sekatan ke atas wakaf khas.](#)

BAHAGIAN III - MAWQUF-ALAIH

Seksyen 11. [Ketiadaan mawquf-alaih.](#)
Seksyen 12. [Keadaan di mana manfaat atau faedah sesuatu mawquf dibahagikan sama rata, dsb.](#)

BAHAGIAN IV - WAKAF TAK SAH

Seksyen 13. [Wakaf tak sah.](#)
Seksyen 14. [Keadaan di mana wakaf kepada sebahagian waris menjadi tidak sah.](#)

BAHAGIAN V - MAWQUF

Seksyen 15. [Syarat-syarat mawquf.](#)
Seksyen 16. [Wakaf premis atau hasil pertanian atas tanah sewa atau pajak.](#)
Seksyen 17. [Saham wakaf.](#)

Seksyen 18. [Hak waqif ke atas manfaat atau faedah mawquf.](#)

BAHAGIAN VI - MENGISTIBDAL DAN MEMBANGUNKAN MAWQUF

Seksyen 19. [Kuasa Majlis untuk istibdal.](#)

Seksyen 20. [Pembangunan mawquf yang telah musnah.](#)

BAHAGIAN VII - JAWATANKUASA PENGURUSAN WAKAF

Seksyen 21. [Penubuhan Jawatankuasa Pengurusan Wakaf.](#)

Seksyen 22. [Keanggotaan Jawatankuasa Pengurusan Wakaf.](#)

Seksyen 23. [Mesyuarat Jawatankuasa Pengurusan Wakaf.](#)

Seksyen 24. [Kuasa Jawatankuasa Pengurusan Wakaf.](#)

Seksyen 25. [Kuasa tambahan Jawatankuasa Pengurusan Wakaf dengan persetujuan Majlis.](#)

Seksyen 26. [Perbelanjaan.](#)

Seksyen 27. [Elaun.](#)

Seksyen 28. [Pengosongan jawatan.](#)

Seksyen 29. [Pembatalan pelantikan](#)

Seksyen 30. [Pelantikan anggota baru.](#)

Seksyen 31. [Pemakaian Jadual Kedua.](#)

BAHAGIAN VIII - KUASA-KUASA MAJLIS

Seksyen 32. [Majlis sebagai pemegang amanah tunggal.](#)

Seksyen 33. [Kuasa Majlis dalam pembelian harta.](#)

Seksyen 34. [Kuasa Majlis melantik Pendaftar wakaf.](#)

Seksyen 35. [Kuasa Majlis memberi arahan.](#)

Seksyen 36. [Kuasa tambahan Majlis ke atas Jawatankuasa Pengurusan Wakaf.](#)

Seksyen 37. [Hak Majlis ke atas manfaat atau faedah mawquf daripada wakaf khas.](#)

Seksyen 38. [Manfaat atau faedah daripada wakaf khas atau am.](#)

Seksyen 39. [Kumpulan Wang Wakaf.](#)

Seksyen 40. [Kuasa Majlis membuat tuntutan sewaan atau nilai atas apa-apa manfaat atau faedah.](#)

Seksyen 41. [Perlantikan pegawai dan pekhidmat.](#)

BAHAGIAN IX - PERUNTUKAN AM

Seksyen 42. [Keesahan perbuatan dan prosiding.](#)

Seksyen 43. [Ketentuan mawquf.](#)

Seksyen 44. [Pengertian suratcara.](#)

Seksyen 45. [Menceroboh ke atas tanah wakaf.](#)

Seksyen 46. [Hukum Syarak.](#)

Seksyen 47. [Kuasa untuk membuat peraturan-peraturan.](#)

Seksyen 48. [Perletakhakan mawquf.](#)

Seksyen 49. [Fatwa dikehendaki untuk pembangunan harta wakaf.](#)

Seksyen 50. [Pemberhentian pemakaian Bahagian IV Enakmen Pentadbiran Hukum Syarak 1952.](#)

[JADUAL PERTAMA](#)

[JADUAL KEDUA](#)

Seksyen 1. Tajuk Ringkas, Pemakaian Dan Permulaan Kuat Kuasa.

(1) Enakmen ini bolehlah dinamakan Enakmen Wakaf (Negeri Selangor) 1999.

(2) Enakmen ini hendaklah terpakai di Negeri Selangor.

(3) Enakmen ini hendaklah mula berkuat kuasa pada tarikh yang ditetapkan oleh Duli Yang Maha Mulia Sultan melalui pemberitahuan dalam Warta.

Seksyen 2. Tafsiran.

(1) Dalam Enakmen ini, melainkan jika konteksnya menghendaki makna yang lain-

"Enakmen Pentadbiran" ertinya Enakmen Pentadbiran Perundangan Islam 1989 [En.2/89];

"Baitulmal" mempunyai erti yang sama yang diberikan kepadanya di bawah subseksyen 94 (1) Enakmen Pentadbiran Hukum Syarak 1952 [En.3/52];

"harta" termasuklah harta alih atau harta tak alih dan apa-apa faedah dalam apa-apa harta alih atau harta tak alih, apa-apa hak, kepentingan, hak milik, tuntutan, hak dalam tindakan, sama ada pada masa sekarang atau pada masa hadapan atau selainnya yang mempunyai nilai menurut Hukum Syarak;

"Hukum Syarak" ertinya Hukum Syarak mengikut Mazhab Shafie atau mengikut mana-mana satu Mazhab Hanafi, Maliki atau Hanbali;

"istibdal" ertinya menggantikan suatu harta wakaf dengan harta lain atau wang yang sama atau lebih tinggi nilainya sama ada melalui gantian, belian, jualan atau apa-apa cara lain menurut Hukum Syarak;

"Jawatankuasa Perundangan Hukum Syarak" ertinya Jawatankuasa Perundangan Hukum Syarak yang ditubuhkan di bawah subseksyen 34(1) Enakmen Pentadbiran;

"Kumpulan Wang Wakaf" ertinya kumpulan wang yang terdiri daripada semua wang dan harta yang diwakafkan atau apa-apa hasil yang diperolehi daripada mawquf atau melalui istibdal;

"Mahkamah" ertinya Mahkamah Tinggi Syariah yang ditubuhkan di bawah seksyen 37 Enakmen Pentadbiran;

"Majlis" mempunyai erti yang sama yang diberikan kepadanya dalam Enakmen Pentadbiran;

"marad al-maut" ertinya penyakit membawa maut yang memenuhi syarat-syarat yang berikut-

- (a) penyakit itu mestilah menyebabkan kematian simati;
- (b) penyakit itu mestilah menyebabkan kebimbangan kematian dalam minda simati; dan
- (c) mestilah terdapat beberapa tanda luaran suatu penyakit yang serius;

"mawquf" ertinya harta wakaf;

"**mawquf-alaih**" ertinya orang yang berhak menerima apa-apa manfaat atau faedah daripada mawquf itu;

"**orang**" termasuklah kumpulan orang sama ada diperbadankan atau tidak diperbadankan;

"**rasyid**" ertinya seseorang yang tidak dungu, tidak nyanyuk, dan tidak diisytiharkan bankrup di bawah mana-mana undang-undang bertulis;

"**saham wakaf**" ertinya pewujudan suatu wakaf melalui saham-saham yang ditawarkan dan kemudiannya diwakafkan oleh pembeli kepada Majlis;

"**sighah**" ertinya pernyataan wakaf yang dibuat sama ada secara lisan, tulisan bersama lafaz atau isyarat;

"**wakaf**" ertinya menyerahkan apa-apa harta yang boleh dinikmati manfaat atau faedahnya untuk apa-apa tujuan kebajikan sama ada sebagai wakaf am atau wakaf khas menurut Hukum Syarak tetapi tidak termasuk amanah sebagaimana yang ditakrifkan di bawah Akta Pemegang Amanah 1949 [Akta 208];

"**wakaf am**" ertinya sesuatu wakaf yang diwujudkan bagi tujuan kebajikan umum menurut Hukum Syarak;

"**wakaf khas**" ertinya sesuatu wakaf yang diwujudkan bagi tujuan kebajikan yang khusus menurut Hukum Syarak;

"**waqif**" ertinya orang yang mewujudkan wakaf.

(2) Semua perkataan dan ungkapan yang digunakan di dalam Enakmen ini dan tidak ditakrifkan di dalamnya tetapi ditakrifkan dalam Akta Tafsiran 1948 dan 1967 [Akta 388], hendaklah mempunyai erti yang diberikan kepadanya masing-masing setakat yang erti itu tidak bercanggah dengan Hukum Syarak.

(3) Bagi mengelakkan keraguan tentang identiti atau pentafsiran perkataan-perkataan dan ungkapan-ungkapan yang digunakan dalam Enakmen ini yang disenaraikan dalam Jadual Pertama, rujukan bolehlah dibuat kepada tulisan Arab bagi perkataan-perkataan dan ungkapan-ungkapan itu yang ditunjukkan bersementaraan dengannya dalam Jadual itu.

Seksyen 3. Pewujudan Wakaf.

(1) Kecuali sebagaimana yang diperuntukkan selainnya kemudian daripada ini, seseorang yang telah mencapai umur lapan belas tahun, sempurna akal dan rasyid boleh mewakafkan hartanya untuk apa-apa tujuan khairat menurut Hukum Syarak.

(2) Sesuatu wakaf boleh diwujudkan sama ada sebagai wakaf am atau wakaf khas.

(3) Wakaf hendaklah diwujudkan melalui sighah di hadapan dua orang saksi menurut Hukum Syarak.

Seksyen 4. Mula Berkuat Kuasa Wakaf.

(1) Sesuatu wakaf hendaklah mula berkuat kuasa apabila kesemua rukun dan syarat wakaf itu disempurnakan melainkan diperuntukkan secara nyata bahawa ia akan mula berkuat kuasa selepas kematian waqif.

(2) Sesuatu wakaf yang telah berkuat kuasa, tidak boleh dijual atau dihibah oleh waqif atau diwarisi oleh mana-mana orang.

Seksyen 5. Waqif Berhak Menentukan Syarat-Syarat Mawquf-Alaih.

Jika suatu wakaf menetapkan apa-apa syarat tertentu sebelum seseorang mawquf-alaih berhak kepada manfaat atau faedah sesuatu mawquf, penentuan pematuhan syarat itu hendaklah dibuat oleh-

- (a) waqif; atau
- (b) Jawatankuasa Pengurusan Wakaf dengan persetujuan waqif.

Seksyen 6. Pendaftaran Wakaf.

Tertakluk kepada seksyen 4, setiap wakaf hendaklah secepat mungkin yang boleh didaftarkan dalam apa-apa bentuk atau cara yang telah ditetapkan oleh Majlis.

Seksyen 7. Wakaf Oleh Seseorang Yang Dalam Keadaan Marad Al-Maut.

Seseorang yang dalam keadaan marad al-maut tidak boleh mewakafkan lebih daripada satu pertiga hartanya kepada mana-mana orang selain daripada warisnya.

Seksyen 8. Wakaf Taklik.

(1) Mana-mana orang boleh mewujudkan wakaf taklik dan akan mula berkuat kuasa apabila berlakunya sesuatu kejadian yang disyaratkan oleh wakif.

(2) Jika wakaf taklik itu dibuat untuk berkuat kuasa selepas kematian waqif, wakaf tersebut hanya boleh menjadi sah setakat satu pertiga daripada hartanya sahaja.

Seksyen 9. Wakaf Irsod, Muabbad, Musyak Atau Musytarak.

(1) Seorang waqif boleh mewujudkan wakaf irsod, muabbad, musyak atau musytarak terhadap keseluruhan, atau sebahagian daripada harta.

(2) Bagi maksud seksyen ini-

- (a) "**wakaf irsod**" ertinya sesuatu tanah yang diwakafkan oleh mana-mana perbadanan, institusi, pertubuhan atau badan-badan lain menurut Hukum Syarak;
- (b) "**wakaf muabbad**" ertinya wakaf yang berkekalan;

- (c) "**wakaf musyak**" ertinya mewakafkan apa-apa hak ke atas mana-mana harta yang dimiliki bersama yang tidak boleh dipecah bahagikan; dan
- (d) "**wakaf musytarak**" ertinya penyatuan beberapa wakaf termasuklah wakaf yang diwujudkan melalui istibdal dan saham wakaf.

Seksyen 10. Sekatan Ke Atas Wakaf Khas.

Sesuatu wakaf khas yang dibuat selepas mula berkuat kuasanya Enakmen ini hendaklah batal dan tidak sah melainkan jika-

- (a) Duli Yang Maha Mulia Sultan, atas nasihat Majlis, dengan nyata memperkenalkan dan mengesahkannya; atau
- (b) ia telah dibuat semasa waqif dalam keadaan marad al-maut dan kemudiannya meninggal dunia akibat sakit itu dan dengan syarat ia telah dibuat melalui sighth di hadapan dua orang saksi.

Seksyen 11. Ketiadaan Mawquf-Alaih.

(1) Jika, dalam suatu wakaf-

- (a) waqif tidak menamakan mawquf-alaih;
- (b) mawquf-alaih telah mati; atau
- (c) mawquf-alaih tidak dapat dikesan dalam tempoh empat tahun selepas berkuat kuasanya wakaf,

wakaf itu hendaklah menjadi wakaf am melalui pemberitahuan oleh Majlis dalam Warta.

(2) Tertakluk kepada subseksyen (3), mana-mana mawquf-alaih yang wakafnya telah diwartakan oleh Majlis sebagai wakaf am di bawah subseksyen (1)(c) boleh memohon satu perintah Mahkamah untuk menjadikan wakaf tersebut sebagai wakaf khas semula.

(3) Mawquf-alaih tidak berhak ke atas apa-apa manfaat atau faedah mawquf itu sebelum satu perintah di bawah subseksyen (2) dibuat.

Seksyen 12. Keadaan Di Mana Manfaat Atau Faedah Sesuatu Mawquf Dibahagikan Sama Rata, Dsb.

(1) Jika terdapat lebih dari seorang mawquf-alaih dan waqif tidak menetapkan untuk mereka kadar manfaat atau faedah masing-masing terhadap mawquf itu, ia hendaklah dibahagikan sama rata di antara mereka.

(2) Seksyen 11 hendaklah terpakai kepada manfaat atau faedah mana-mana mawquf-alaih yang tersebut di bawah subseksyen (1) seksyen ini yang telah mati atau tidak dapat dikesan tanpa memerlukan apa-apa pemberitahuan dalam Warta.

(3) Jika sesuatu wakaf dibuat kepada asnaf zakat tetapi tidak ditentukan kadar masing-masing, manfaat atau faedah daripada mawquf itu hendaklah dibahagi mengikut kadar asnaf zakat.

Seksyen 13. Wakaf Tak Sah.

Sesuatu wakaf adalah tidak sah jika-

- (a) dalam hal wakaf taklik, sebelum syarat taklik yang dikehendaki itu dipenuhi semasa hayatnya, waqif mati;
- (b) ia dibuat bagi apa-apa tujuan maksiat;
- (c) ia dibuat kepada mana-mana orang bagi tujuan yang bukan untuk menghampirkan diri kepada Allah;
- (d) ia dibuat untuk manfaat atau faedah diri sendiri; atau
- (e) ia bertentangan dengan Hukum Syarak atau mana-mana undang-undang bertulis.

Seksyen 14. Keadaan Di Mana Wakaf Kepada Sebahagian Waris Menjadi Tidak Sah.

Sesuatu wakaf tidak sah jika dibuat kepada sebahagian waris yang berhak mendapat harta pusaka waqif, kecuali dengan persetujuan semua waris lain.

Seksyen 15. Syarat-Syarat Mawquf.

(1) Mawquf hendaklah suatu harta yang-

- (a) dimiliki oleh waqif;
- (b) tidak terhalang; dan
- (c) boleh memberi manfaat atau faedah.

(2) Tertakluk kepada subseksyen (1), sesuatu wakaf adalah sah walaupun pada masa wakaf itu diwujudkan--

- (a) mawquf tidak memberi apa-apa manfaat atau faedah; atau
- (b) mawquf masih dalam sewaan.

(3) Manfaat atau faedah mawquf hendaklah dimasukkan ke dalam Kumpulan Wang Wakaf.

Seksyen 16. Wakaf Premis Atau Hasil Pertanian Atas Tanah Sewa Atau Pajak.

Seseorang waqif boleh mewakafkan apa-apa premis yang dimilikinya di atas mana-mana tanah yang disewa atau dipajak olehnya atau apa-apa hasil pertanian yang diperolehi daripada tanah tersebut.

Seksyen 17. Saham Wakaf.

(1) Majlis boleh menawarkan saham wakaf terhadap apa-apa harta yang diperolehinya atau yang akan diperolehinya kepada mana-mana orang untuk saham-saham itu dibeli dan kemudiannya diwakafkan kepada Majlis.

(2) Apa-apa harta yang dibangunkan daripada apa-apa hasil di bawah subsekyen (1), hendaklah menjadi wakaf am.

Seksyen 18. Hak Waqif Ke Atas Manfaat Atau Faedah Mawquf.

Seseorang waqif yang mewujudkan wakaf am boleh menikmati manfaat atau faedah mawqufnya.

Seksyen 19. Kuasa Majlis Untuk Istibdal.

Majlis boleh mengistibdalkan apa-apa mawquf dalam keadaan berikut-

- (a) mawquf telah diambil oleh mana-mana pihak berkuasa awam mengikut peruntukan mana-mana undang-undang bertulis;
- (b) kegunaan mawquf tidak lagi mendatangkan manfaat atau faedah sebagaimana yang dikehendaki oleh waqif; atau
- (c) kegunaan mawquf tidak menepati tujuan wakaf.

Seksyen 20. Pembangunan Mawquf Yang Telah Musnah.

(1) Apa-apa mawquf yang telah musnah sama ada keseluruhannya atau sebahagiannya, boleh dibangunkan semula daripada sumber-sumber berikut-

- (a) pendapatan atau hasil mawquf tersebut;
- (b) Kumpulan Wang Wakaf; atau
- (c) Baitulmal.

(2) Jika sesuatu mawquf telah musnah keseluruhannya dan telah dibangunkan semula dengan menggunakan wang daripada Baitulmal, harta itu hendaklah dianggap menjadi suatu wakaf.

Seksyen 21. Penubuhan Jawatankuasa Pengurusan Wakaf.

Majlis hendaklah menubuhkan suatu Jawatankuasa Pengurusan Wakaf yang akan mentadbir dan menguruskan semua perkara yang berhubungan dengan wakaf di Negeri Selangor.

Seksyen 22. Keanggotaan Jawatankuasa Pengurusan Wakaf.

(1) Jawatankuasa Pengurusan Wakaf hendaklah terdiri daripada-

- (a) Pengerusi yang dilantik dari kalangan anggota Majlis;
- (b) Penasihat Undang-Undang Negeri atau wakilnya;
- (c) Mufti;
- (d) Setiausaha Majlis;
- (e) Pengarah Tanah dan Galian Negeri atau wakilnya; dan
- (f) empat orang anggota lain.

(2) Pendaftar Wakaf hendaklah menjadi Setiausaha Jawatankuasa Pengurusan Wakaf.

(3) Anggota Jawatankuasa Pengurusan Wakaf yang dilantik di bawah subseksyen (1)(a) dan (f), hendaklah dilantik untuk memegang jawatan selama tempoh tiga tahun dan boleh dilantik semula.

(4) Pelantikan anggota Jawatankuasa Pengurusan Wakaf di bawah subseksyen (1)(a) dan (f) boleh pada bila-bila masa ditamatkan oleh Majlis tanpa memberi apa-apa sebab mengenainya.

(5) Anggota Jawatankuasa Pengurusan Wakaf yang dilantik di bawah subseksyen (1)(a) dan (f) boleh, pada-bila masa meletakkan jawatan dengan memberi suatu notis bertulis kepada Majlis.

Seksyen 23. Mesyuarat Jawatankuasa Pengurusan Wakaf.

(1) Pengerusi hendaklah mempengerusikan semua mesyuarat Jawatankuasa Pengurusan Wakaf dan jika Pengerusi tidak hadir, anggota-anggota yang hadir boleh memilih seorang dari kalangan mereka untuk mempengerusikan mesyuarat itu.

(2) Anggota-anggota Jawatankuasa Pengurusan Wakaf hendaklah berusaha untuk mencapai segala keputusan mesyuarat secara konsensus yang jika gagal, keputusan oleh majoriti dua pertiga anggota yang hadir adalah dikehendaki.

Seksyen 24. Kuasa Jawatankuasa Pengurusan Wakaf.

Jawatankuasa Pengurusan Wakaf hendaklah mempunyai kuasa-kuasa berikut-

- (a) untuk menjalankan apa-apa arahan, dasar, ketetapan dan keputusan yang dibuat oleh Majlis berhubung dengan apa-apa mawquf;
- (b) untuk mengawalselia, mengatur, mengurus dan mentadbir mawquf;
- (c) untuk membangun, memaju dan meningkatkan mawquf;
- (d) untuk mentadbir Kumpulan Wang Wakaf; dan
- (e) untuk menjalankan apa-apa kuasa lain atau fungsi yang diperuntukkan di bawah Enakmen ini atau sebagaimana yang diarahkan oleh Majlis dari semasa ke semasa.

Seksyen 25. Kuasa Tambahan Jawatankuasa Pengurusan Wakaf Dengan Persetujuan Majlis.

Jawatankuasa Pengurusan Wakaf boleh, dengan persetujuan Majlis dan tertakluk kepada syarat-syarat persetujuan itu-

- (a) mengistibdalkan apa-apa mawquf; dan
- (b) memaju atau melaburkan mawquf.

Seksyen 26. Perbelanjaan.

Apa-apa perbelanjaan yang dibuat oleh Jawatankuasa Pengurusan Wakaf dalam menjalankan kuasa dan fungsinya di bawah Enakmen ini hendaklah dibayar dari akaun Kumpulan Wang Wakaf atau Baitulmal jika mendapat persetujuan Majlis.

Seksyen 27. Elaun.

Anggota Jawatankuasa Pengurusan Wakaf boleh dibayar apa-apa elaun yang ditentukan oleh Majlis.

Seksyen 28. Pengosongan Jawatan.

Jawatan seseorang anggota Jawatankuasa Pengurusan Wakaf yang dilantik hendaklah menjadi kosong-

- (a) apabila dia mati; atau
- (b) jika dia, dengan notis bertulis yang dialamatkan kepada Majlis, meletakkan jawatannya.

Seksyen 29. Pembatalan Pelantikan

Majlis boleh membatalkan pelantikan mana-mana anggota Jawatankuasa Pengurusan Wakaf yang dilantik jika-

- (a) dia telah disabitkan atas apa-apa kesalahan jenayah atau apa-apa kesalahan lain yang boleh dihukum dengan penjara;
- (b) kelakuannya, sama ada yang berkaitan dengan tanggungjawabnya sebagai anggota Jawatankuasa Pengurusan Wakaf atau selainnya, adalah kelakuan yang memburukkan nama Majlis atau Jawatankuasa Pengurusan Wakaf;
- (c) dia diisytiharkan bankrap atau kerana apa-apa sebab lain, tidak berupaya menunaikan kewajipan-kewajipannya; atau
- (d) dia tidak menghadiri mesyuarat tiga kali berturut-turut tanpa kebenaran Pengerusi.

Seksyen 30. Pelantikan Anggota Baru.

Jika pelantikan mana-mana anggota Jawatankuasa Pengurusan Wakaf telah menjadi kosong di bawah seksyen 28 atau dibatalkan di bawah seksyen 29, Majlis hendaklah melantik mana-mana orang sebagai pengganti mengikut peruntukan subseksyen 22(3).

Seksyen 31. Pemakaian Jadual Kedua.

- (1) Jadual Kedua hendaklah terpakai bagi Jawatankuasa Pengurusan Wakaf.
- (2) Duli Yang Maha Mulia Sultan boleh, dengan perintah, meminda Jadual Kedua.

Seksyen 32. Majlis Sebagai Pemegang Amanah Tunggal.

Walau apa pun apa-apa jua peruntukan yang terkandung dalam mana-mana suratcara atau perisytiharan yang mewujudkan, mengawal atau menyentuh sesuatu wakaf, Majlis hendaklah menjadi pemegang amanah tunggal bagi semua wakaf, sama ada am atau khas, yang terletak di dalam Negeri Selangor.

Seksyen 33. Kuasa Majlis Dalam Pembelian Harta.

- (1) Majlis boleh membeli apa-apa harta bagi tujuan wakaf dengan menggunakan wang daripada
 - (a) Kumpulan Wang Wakaf; atau
 - (b) Baitulmal.

(2) Apa-apa harta yang dibeli di bawah subseksyen (1) (b) hendaklah dianggap menjadi suatu wakaf.

Seksyen 34. Kuasa Majlis Melantik Pendaftar Wakaf.

Majlis hendaklah melantik di kalangan pekhidmat awam Persekutuan atau Negeri seorang Pendaftar Wakaf yang bertanggungjawab untuk-

(a) menyimpan dan menyenggara suatu daftar bagi semua Wakaf dalam bentuk atau cara yang ditentukan oleh Majlis; dan

(b) memegang dan menyimpan segala suratcara, dokumen hak milik atau apa-apa dokumen lain yang berkaitan dengan semua wakaf yang terletak hak kepada Majlis.

Seksyen 35. Kuasa Majlis Memberi Arahan.

Majlis boleh dari semasa ke semasa memberi apa-apa arahan am kepada Jawatankuasa Pengurusan Wakaf dalam melaksanakan kuasa dan fungsinya dan Jawatankuasa Pengurusan Wakaf hendaklah mematuhi arahan-arahan itu.

Seksyen 36. Kuasa Tambahan Majlis Ke Atas Jawatankuasa Pengurusan Wakaf.

Tanpa menjejaskan kuasa-kuasa Majlis di bawah Enakmen ini, Majlis boleh-

(a) mengawalselia kegiatan dan pengurusan Jawatankuasa Pengurusan Wakaf;

(b) memeriksa apa-apa akaun dan rekod yang disimpan dan disenggarakan oleh Jawatankuasa Pengurusan Wakaf; dan

(c) mengarah Jawatankuasa Pengurusan Wakaf supaya mengemukakan kepadanya apa-apa laporan dan penyata, sebagaimana yang ia anggap patut.

Seksyen 37. Hak Majlis Ke Atas Manfaat Atau Faedah Mawquf Daripada Wakaf Khas.

Majlis berhak menggunakan apa-apa manfaat atau faedah daripada suatu wakaf khas untuk membayar semua kos yang perlu dan bersampingan dengannya bagi pentadbiran wakaf itu.

Seksyen 38. Manfaat Atau Faedah Daripada Wakaf Khas Atau Am.

(1) Manfaat atau faedah daripada sesuatu wakaf khas, hendaklah digunakan mengikut syarat-syarat yang ditentukan oleh waqif melainkan syarat-syarat yang bertentangan dengan Hukum Syarak.

(2) Manfaat atau faedah daripada tiap-tiap wakaf am hendaklah dibayar kepada dan menjadi sebahagian daripada Kumpulan Wang Wakaf.

(3) Jika, disebabkan berlalu masa atau berlaku perubahan keadaan, syarat-syarat mana-mana wakaf tidak dapat secara berfaedah dilaksanakan dengan tepat sebagaimana yang dikehendaki oleh waqif, Majlis hendaklah menyediakan suatu rancangan bagi menggunakan manfaat atau faedah yang terlibat itu dengan suatu cara yang se hampir mungkin yang seakan-akan sama sebagaimana yang dikehendaki oleh waqif, dan hendaklah melaksanakan sewajarnya:

Dengan syarat Majlis boleh mengarahkan manfaat dan faedah itu ditambah kepada dan menjadi sebahagian daripada Kumpulan Wang Wakaf.

(4) Jika syarat-syarat mana-mana wakaf adalah sedemikian rupa di mana cara penggunaan harta, manfaat atau faedah tidak dinyatakan, atau tiada ketentuan tentang cara bagaimana ia hendak digunakan, Majlis boleh mengarahkan supaya harta, manfaat atau faedah itu ditambahkan kepada dan menjadi sebahagian daripada Kumpulan Wang Wakaf.

Seksyen 39. Kumpulan Wang Wakaf.

(1) Majlis boleh menubuhkan suatu kumpulan wang yang dikenali sebagai Kumpulan Wang Wakaf.

(2) Kumpulan Wang itu hendaklah terdiri daripada wang dan harta yang diwakafkan atau apa-apa manfaat dan faedah yang diperolehi daripada mawquf atau melalui istibdal.

Seksyen 40. Kuasa Majlis Membuat Tuntutan Sewaan Atau Nilai Atas Apa-Apa Manfaat Atau Faedah.

(1) Majlis boleh menuntut daripada mana-mana orang sewa atau nilai atas apa-apa manfaat atau faedah yang diperolehi oleh orang itu daripada sesuatu mawquf yang orang itu tidak berhak ke atasnya.

(2) Bagi maksud subseksyen (1), Majlis boleh menentukan nilai manfaat atau faedah bagi mawquf tersebut.

(3) Jika tuntutan yang tersebut di bawah subseksyen (1) tidak dijelaskan, ia hendaklah dianggap sebagai hutang yang boleh dituntut oleh Majlis.

Seksyen 41. Perlantikan Pegawai Dan Pekhidmat.

Majlis boleh melantik pegawai dan pekhidmat yang perlu bagi menjalankan maksud Enakmen ini.

Seksyen 42. Keesahan Perbuatan Dan Prosiding.

Tiada apa-apa perbuatan yang dilakukan atau prosiding yang diambil di bawah Enakmen ini boleh dipersoalkan atas alasan bahawa-

- (a) wujud apa-apa kekosongan dalam keanggotaan, atau apa-apa kecacatan dalam penubuhan Jawatankuasa Pengurusan Wakaf; atau
- (b) wujud apa-apa peninggalan, kecacatan atau ketakteraturan yang tidak menyentuh merit sesuatu kes.

Seksyen 43. Ketentuan Mawquf.

Mana-mana pihak boleh membuat permohonan kepada Mahkamah untuk menentukan sama ada sesuatu harta itu telah menjadi mawquf.

Seksyen 44. Pengertian Suratcara.

Jika, pada pendapat Majlis, makna atau kesan mana-mana suratcara atau perisytiharan yang mewujudkan atau menyentuh mana-mana wakaf adalah samar-samar atau tidak jelas, Majlis bolehlah merujuk perkara itu kepada Mahkamah bagi mendapatkan keputusannya mengenai makna dan kesan tersebut dan hendaklah bertindak menurut apa-apa perintah yang dibuat oleh Mahkamah.

Seksyen 45. Menceroboh Ke Atas Tanah Wakaf.

- (1) Mana-mana orang yang tanpa kebenaran Majlis-
 - (a) menduduki, atau membina apa-apa binaan atau struktur di atas mana-mana tanah wakaf;
 - (b) membersihkan, membajak, menggali, mengepong atau menanam tanaman di atas mana-mana tanah wakaf atau sebahagiannya; atau
 - (c) memotong, mengambil atau mengeluarkan apa-apa hasil atas atau daripada tanah wakaf itu,

adalah melakukan suatu kesalahan dan, apabila disabitkan, boleh didenda tidak melebihi lima ribu ringgit, atau dipenjara selama tempoh tidak melebihi tiga tahun, atau kedua-duanya sekali, dan dalam hal kesalahan berterusan, didenda tidak lebih daripada lima ratus ringgit bagi tiap-tiap hari kesalahan itu berterusan.

(2) Seseorang yang membina atau mendirikan apa-apa bangunan atau halangan di atas tanah wakaf hendaklah, jika diarahkan oleh majlis, meroboh, memusnah dan membersihkan segala binaan dan halangan di atas tanah wakaf itu dengan perbelanjaan sendiri.

(3) Jika orang yang tersebut di bawah subseksyen (2) enggan mematuhi arahan di bawah subseksyen yang dinyatakan itu, Majlis boleh menyebabkan diroboh, dimusnah atau dibersihkan segala binaan dan halangan di atas tanah wakaf itu dan boleh menuntut kos daripada orang tersebut.

Seksyen 46. Hukum Syarak.

(1) Mana-mana peruntukan atau tafsiran peruntukan di bawah Enakmen ini yang berlawanan dengan Hukum Syarak hendaklah terbatal setakat yang berlawanan itu.

(2) Jika terdapat apa-apa lakuna atau jika apa-apa perkara tidak diperuntukkan dengan nyata dalam Enakmen ini, Mahkamah hendaklah merujuk kepada Hukum Syarak.

Seksyen 47. Kuasa untuk membuat peraturan-peraturan.

Majlis boleh, melalui pemberitahuan dalam Warta, membuat kaedah-kaedah bagi maksud

melaksanakan peruntukan-peruntukan Enakmen ini, dan khususnya, tetapi tanpa menjejaskan keluasan kuasa yang terdahulu, kaedah-kaedah itu boleh mengadakan peruntukan bagi-

- (a) tatacara kewangan;
- (b) fi dan bayaran;
- (c) menetapkan borang-borang yang hendak digunakan berkenaan dengan apa-apa tindakan atau perkara yang akan diambil menurut Enakmen ini;
- (d) pelaksanaan pentadbiran dan pengurusan saham wakaf;
- (e) pengendalian manfaat atau faedah wakaf; dan
- (f) perkara-perkara lain yang perlu bagi pelaksanaan peruntukan-peruntukan Enakmen ini.

Seksyen 48. Perletakhakan Mawquf.

(1) Majlis hendaklah mengambil segala langkah yang perlu secepat mungkin yang boleh untuk meletakhakkan kepadanya semua wakaf yang diwujudkan di bawah Enakmen ini.

(2) Apa-apa manfaat atau faedah daripada sesuatu mawquf hendaklah terletak hak kepada Majlis mulai dari tarikh wakaf itu mula berkuat kuasa, dan Majlis boleh menuntut apa-apa manfaat atau faedah sesuatu mawquf daripada mana-mana orang sebelum pendaftaran wakaf itu.

(3) Semua mawquf yang terletak dalam Negeri Selangor, sebelum sahaja Enakmen ini mula berkuat kuasa hendaklah, tanpa apa-apa pemindahhakkan, penyerahhakan, atau pemindahmilik, dan dalam hal harta tak alih, sebaik sahaja didaftarkan mengikut peruntukan-peruntukan di bawah Kanun Tanah Negara [Akta 56/65], terletak pada Majlis, bagi maksud wakaf yang menyentuh mawquf itu.

(4) Majlis hendaklah mengambil segala langkah perlu untuk meletakhak pada Majlis bagi maksud-maksud yang serupa mana-mana mawquf sedemikian yang terletak di luar Negeri Selangor.

Seksyen 49. Fatwa Dikehendaki Untuk Pembangunan Harta Wakaf.

Majlis hendaklah merujuk kepada Jawatankuasa Perundingan Hukum Syarak untuk keputusannya berhubung dengan pembangunan mana-mana mawquf sekiranya ia melibatkan persoalan Hukum Syarak yang belum terputus atau yang menimbulkan pertikaian.

Seksyen 50. Pemberhentian Pamakaian Bahagian IV Enakmen Pentadbiran Hukum Syarak 1952.

Seksyen 94 hingga 100 (Bahagian IV) Enakmen Pentadbiran Hukum Syarak 1952 yang berhubung dengan wakaf hendaklah dengan ini terhenti terpakai bagi Negeri Selangor pada permulaan kuatkuasa Enakmen ini.